

沈乃文主編

明別集叢刊 第四輯

第三十一冊

黃山書社





國家出版基金項目
NATIONAL PUBLICATION FOUNDATION

『十二五』國家重點圖書出版規劃項目
2011—2020年國家古籍整理出版規劃重點項目

沈乃文 主編

明別集叢刊 第四輯

第三十一冊

黃山書社



(明) 孟化鯉 撰

孟雲浦先生文集四卷

清光緒三十年鴻文局石印續中州名賢文表本

明史本傳 與孟秋合傳

孟化鯉字叔龍河南新安人孟秋字子成荏平人化鯉年十六慨然以聖賢自期而秋兒時受詩至桑中諸篇輒棄去不竟讀化鯉舉萬曆八年進士授戶部主事時相欲招致之辭不往權稅河西務與諸生講學河西人尸祝之南畿山東大饑奉命往振全活多改吏部歷文選郎中佐尚書孫鑰黜陟名籍甚時內閣權重每銓除必先白化鯉獨否中官請託復不應以故多不悅都給事中張棟先以建言削籍化鯉奏起之忤旨奪堂官俸謫化鯉及員外郎項復宏主事姜仲軾雜職閹臣疏救命以原品調外項之言

卷四十七本傳

官復交章救帝益怒奪言官俸斥化鯉等為民既歸築書院川上與學者講習不輟四方從游者恆數百人久之卒秋舉隆慶五年進士為昌黎知縣有善政遷大理評事去之日老稚載道泣留以職方員外郎督視山海關關政久弛奸人出入自擅秋禁之嚴中流言萬曆九年京察坐貶歸塗與妻孥共駕一牛車道旁觀者咸歎息許季遠嘗過張秋造其廬見節屋數椽書史狼籍其中歎曰孟我疆風味大江以南未有也我疆者秋別號也後起官刑部主事歷尚寶丞少卿卒秋既歿廷臣為請諡者章數上天啟初賜諡清憲化鯉自貢入太學即與秋道義相勗後為吏部

郎而秋官尚寶比舍居食飲起居無弗共者時人稱二孟化鯉之學得之洛陽尤時熙而秋受業於邑人張後覺時熙師劉魁後覺則顏鑰徐樾弟子也

雲浦孟先生傳

呂維祺

先生蓋伊雒間真儒篤學好修者卒二十七年海內如吉水西安虞城諸君子為詩為賦為贊為誌銘為墓碑是不一人而獨無傳呂子乃為之曰先生姓孟名化鯉字叔龍其先秦人也洪武初有好古者始家新安焉好古生真真生聰聰生倫倫生秋是為贈南戶部主事雙臺公配衛太安人夢有光如日大於斗遂誕先生蓋嘉靖二十有四年

卷四十七本傳

乙巳閏正月二十有四日也先生幼而警敏長而端摯其度修而美髯其性巖巖識者知其非常人為兒時嗜讀小學八歲讀孝經論語十三讀易旁通經史及左國秦漢比為文自構一格不傍人籬下十七補諸生便慨然以古道自任館於盟津一日謂其外兄曰古人為學必正心修身無愧怍而後即安豈沾沾舉子業哉於是聞西川尤先生質直力行倡道淑人遂往師事之讀擬學小記曰濂雒真傳具在於茲凡西川先生所言手自籍記咸帙會督學試所部拔其文行皆第一尋應恩詔首貢肄業成均試第二有友郭青螺黃慎軒孟我疆而我疆尤密聯會講學以道

義相砥礪癸酉中河南鄉試第九故事同年具呈坊價先生瞿然曰吾輩方將起家清仕路抑奔競乃先行請託耶獨不列名凡先生初貴及偕計有司以故事徵驛遞路費先生皆峻卻不受庚辰成進士授南戶部主事時相欲致先生為重終不往謁尋服雙臺公喪起補戶部主事覓銀庫痛革宿弊出推河西務口不言錢惟與子衿耆老講聖諭六語發明正學行之日士民肖像祀江干丙戌江南山左大饑先生奉命往賑哀益稽核全活無算尤厚資善士是年改驗封主事會衛太安人卒先生兩丁內外艱哀毀骨立喪制一準家禮斟酌合宜可為法式居喪不茹葷不

卷四十七本傳

三

入內不妄言笑蓋先生天性孝事兩尊人無間或愠則率婦長跪請過雙臺公易簣先生之留都任在途以兩叔父視舍斂比裏事每朔必稽顙曰見兩叔父即見吾父母也起復補稽勲厯文選郎先生私念用人本朝廷公典而或干以私豈不上負君下負所學故一意孤立雖大貴人氣焰薰灼不少徇往例銓法多先白政府然後補牘先生不為動中璫請託毫不假借敕守閩勿通一刺凡諸舞文吏所得自行其意者搜剔殆盡於是內外率側目視先生矣張可庵棟以都諫建言國本謫時論建之弗敢用也先生疏起之上業令票旨政府封還陰陽其詞遂忤上調外尋

以中外力救削先生籍先生神色自若猶夙夜治文書付所司始跨蹇歸歸之日簪紳絡繹出租於郊見先生行李蕭然家奴徒走皆嘆曰賢者去國我輩尸位獨無愧於心乎郡邑長吏率求一見不可得或負弩津途問選君何往而先生已微服過矣初先生從西川游歸而設會講學寒暑不輟多所興起西川每對人曰吾道西矣嗣與我疆諸先生講學京邸又於川上建兩賢祠後為宗賢樓聚圖書羅俊乂四方之士聞風負笈若陝澠嵩永雒孟汝羅秦晉聯翩而至無慮數百人至是先生歸諸弟子迎於黃河之湄歌詠之聲遏雲振木先生於道益精進所發明益開朗

卷四十七本傳

四

澄澈非獨擴良知之緒即上邇洙泗中衍伊雒當亦非先生莫屬也先生所至人化之在推則清貪墨之風在銓則抑奔遏之途在里則以恬淡古樸為里俗先故其里不用聲歌不曳綺羅婚嫁不論財非嘉宴不用鼓吹人謂新安有古人風先生之教也雖窮鄉幽谷之人無不稱曰孟師孟師先生精神強毅每漏下五鼓即起課諸子弟夜分咿唔不倦亡何疾革弟化鯨侍藥猶孳孳勉以為學又口占四詩有聞道未足之意遂瞑門人相視失聲城為罷市澠有老嫗婦聞而悲之曰天下無福耶其感人之深如此海內君子過其墓多泣然淚下凡弔先生者不曰皋夔稷契

則曰濂洛關閩不曰精心卓詣千古有賴則曰嗟吾道之墜地慨斯文之喪天嗚呼痛哉大抵先生之學以無欲為宗其教人則專以孝弟忠信慎獨為要不為高深元冥之論至平至實至易至簡至純至粹有門人王參君以悟者自總州師先生信先生尤篤其贊先生曰仕以達道學本無欲知言哉先生丁酉正月二十六日卒葬城東函谷之阜明年祠鄉賢大中丞鍾公復以輿論請建祠春秋特祀壬戌奉詔贈中大夫光祿寺卿子一誠孫瑛瑁瑗瑤瑤一誠皆能繼先生志所著有尊聞錄讀易寤言諸儒要錄理學功臣言行條名賢卓行條焚黃葬冠儀注文集八卷

卷四十七本傳

五

行於世先生號雲浦學者稱雲浦先生

呂子曰嗟乎道學不明世日趨於墨衰喬詐脂韋導嚮而不可砥也相習而常惟言學則非而姍笑之以為怪竄嚴所由豈以世有一種偽學口而弗躬不然則迂執而弗裨於用今觀先生力行孝弟古道淑人且理財用人齊家化俗隨試而效故凡口而弗躬迂執而弗裨於用皆學之似而非也非學之尤也先生當世趨波靡之日撫而不淫矣而不競遜而不悔此之謂擔當於道豈顧人姍笑豈向人面孔生活真吾道之一砥柱而惜不假之年天也湖湘學者伊雖為洙泗嫡派而先生蹶起上接月川之鉢近接西

川之鐸程邵以後一人而已近先生之居如此其甚讀其書尚論其人夫亦愈知學矣

雲浦孟公墓誌銘

楊東明

余年友雲浦孟公卒遺孤一誠走使弟化鯨具行略楊甥玉潤具行狀屬余為誌公名世大賢一旦棄人間世此乾坤氣運所關匪細故也余方擗踊慟悼之不暇何能搦管抽思為誌哉獨念余辱附同心公之隱德有家人弟子未及知而余獨知者又安忍禁瓦缶之鳴不令威德光昭於永永哉按狀公諱化鯨字叔龍別號雲浦家世陝西郃陽人洪武初祖諱好古者偕從兄好義好德好然徙新安家

卷四十七墓誌

六

焉高祖真生聰聰生倫倫生三子曰秋曰夏曰仲秋即公父贈南戶部主事配衛氏封太安人以嘉靖二十四年閏正月二十四日生公公生有異質讀書一目輒不忘少為邑庠弟子員居嘗默然循省謂舉子業不足盡人也乙丑始拜西川先生門下讀其擬學小記諸書欣然有當于心凡先生片言隻字罔不籍記佩服久之幡然解悟吟弄而歸創文峰會講興起斯文遠近趨門牆受業者甚眾西川先生曰吾道大明于西方蓋喜公之能承其志也已巳膺恩選癸酉領鄉薦庚辰成進士同年友有連名呈請坊值者公曰優士厚典而求得之可乎不列名識者已知公非

常品矣辛巳除授南戶部主事尋丁外艱遵禮守制酌古
準俗皆可為後人法癸未建兩賢祠設西川方山二先生
位率諸生展拜日講學其中尋以服闋北上復除戶部主
事領河西鈔關已而直隸山東饑公以望奉命往賑之全
活以百萬計公自是譽望日隆廟堂推重尋轉吏部主事
歷官選司郎中公堂選裁奔競拔淹滯胥吏積弊搜剔殆
盡往者遷除方面重臣先關白政府公以用人取自上裁
遇缺輒具名疏請不為白政府以公大賢亦不以往例求
之舊凡大選中貴巨璫輒請託周利率為常事公毫無所
徇於是中貴人側目視公日欲伺間隙中之矣前諫臣可

卷四十七墓誌

十

庵張公棟以建言奪爵時論譴之而弗敢用也公曰薦賢
為國利害何計疏上遂大忤上意國司被譴公意氣自若
徐理案牘付典守葛巾野服飄然跨蹇歸去山居習靜即
大貴人可仰而不可得即聯屬舊同志日講學二賢祠中
挾汙永廬汝濱光羅間翕然風動負笈至者數百人公為
慨民間舍居之日與討論剗劇無少倦丙申余游關中道
新安拜二賢祠坐諸士下風而座中若長若少若儒紳韋
布士濟濟然和秩秩然序僛僛然質疑問難少頃歌韻洋
洋響徹洛澗之濱猗與盛哉有友揭中行章為問余曰中
行非絕德也日用間一點良知恰當處即是矣人自中行

論甚狂狷公曰然哉堯舜執中用中亦只些子伎倆更無
別法信得及便知人皆可為堯舜只是成就自家物事無
俟遠求余復設難曰堯舜大聖人也吾儕當下反觀用何
抵當而張云可為不亦過乎公曰我以無堯舜者抵堯舜
夫良知無知也無知乃無不知存此是為未發之中措之
即為中行之士此人心虛體萬化根源學者須宜理會一
時友朋聞之多有省云比余關中還復詣公寓請益公出
所著易訓示余大都以心體立說與程朱訓異余讀而訝
之公曰易萬古心學之源也而觀象玩占淺孰甚焉故謬
歸諸心俾學道者知所原本云余乃益嘆公精心卓詣非

卷四十七墓誌

八

淺淺可窺千古絕學方有深賴乃一疾竟不起焉豈天之
將喪斯文歟何奪公之速也公制行謹嚴取予尤慎自思
選鄉舉輒辭常例不受迨署銀庫推鈔關典銓衡靡匪利
藪而所至輒有廉聲家食數年力絕餽遺有以苦節病之
者曰第見世儒利心不下吾不敢蹈之耳公學有深解至
其教人則一以孝弟忠信為本不為元者高深之談歲時
享祀祠堂必誠必信子弟輩有不閑禮度者輒嚴督不少
假貸修身教家踐履篤實視夫空談感而實行疎者未可
同日語矣高臥東山望隆朝野兩臺交章力薦動以舉廢
稷契濂洛關閩目之則公之所養所負可知矣卒之日哀

動遠通行道之人無不隕涕著有尊聞錄讀易解言理學
功臣言行條名賢卓行條焚黃葬冠諸儀注摘句通鑑增
減性理音釋四書五經纂輯諸儒要錄門弟子皆手錄家
藏以需刊布享年五十有三萬曆二十五年正月二十六
日卒配龔氏封安人男一誠邑庠生娶董氏女二長適孟
津錄事梁能子生員允濟次適邑庠生王誥子生員親賢
十月十三日葬於邑東函谷之北原虞城楊子東明為之
灑泣銘曰

嵩嶽降神洛瀍毓粹誕育名賢出類拔萃學務躬行志存
錫類著書立言發矇呼寐篤實輝光丰神益晦邇流伊洛

卷四十七墓誌

九

窮源洙泗養晦東山乾坤倚庇天喪哲人勲猷未遂我為
勒銘潛焉墮淚函谷之原百世永禧

續中州名賢文表卷第四十七

宛平 邵松年 伯英

孟雲浦先生 文集

序

月川曹先生錄粹序

蓋宋濂洛諸儒明鄒魯之學入我朝得白沙姚江而大明
然先白沙姚江以此學鳴天下有兩先生焉河東薛文清
河南曹月川也月川先生生洪武永宣之際嗜古篤行明
道淑人當世翕然宗仰若山斗彭少保幸庵謂我朝道學
之傳斷自先生始誠為確論先生科第仕宦生卒皆先文

續中州名賢文表卷四十七

十

清文清嘗稱先生自少讀書即有求道之志遂由關洛以
邇濂溪且曰理明心定有德有言蓋學同行同而尤推重
如此乃今文清得請從祀而先生闕然祀與否於先生無
加損然世道人心繫之矣或曰先生篤行君子也所著書
羽翼朱傳舉業爾昔程子作字甚敬曰即此是學先生學
以一敬為主舉業即德業也且訓經曰傳翼傳即所以翼
經而況先生學本六經又非專為舉業者乎今夫躬行君
子聖人以為難可少哉又況國初志學者鮮而先生獨以
斯道為己任其言精融閎透雖稍遜白沙姚江然篤行初
無二轍今距先生幾二百年其孫子及里中後進數十人

猶相與恪遵遺訓聯會觀摩究明此學啟佑之功又大先生著述甚多曩究平李尹蔭欲重刻不果又數年馬子行坤輩與先生七世孫繼儒來新安論學鯉輒忘其愚陋敬摘先生言之粹者編次鈐梓俾論世者知先生之學不詭于鄒魯濂洛而併敘其從祀之後于文清無亦竊附彭少保之意歟少保向者云云蓋寓書河南撫臺梧山李公表章先生者也

擬學小記續錄序

西川先生擬學編嘉靖乙丑鯉初謁即請而手抄之是後凡切磋于朋友授受于門人隨得隨錄藏在私篋久矣隆

卷四十七

二

慶庚午洛中諸君子遵先生約作會城南質問得觀此編慮手抄之不及也相與刻梓為卷凡八表兄李伯生氏取所刻本另為編次梁君可氏復刻諸關中今所傳六卷是也據鯉所藏先生訓言總若干卷茲刻才什之五六往欲併入表兄編次先生不可且曰舊刻亦多毋更入鯉唯唯而退居嘗莊誦開我茅塞砭我沈痼中心感發勃不可遏真若一一為鯉設者無論長篇即三二言讀之咸聲自覺如洪鐘之鏗鉤閤遠震撞我心也則長篇感動可知已蓋先生一體之念懇切有觸而發皆懇切語鯉所以讀之如洪鐘震撞然者懇切之所感也通者檢閱未刻卷條深

懼簡表散逸乃做舊刻篇名別為一編經疑餘言雜著紀聞各一卷質疑二卷劉伯舉氏及鯉私錄一卷附于末共七卷僭題曰續錄用別關洛兩刻云

秦關先生要語序

藍田王秦關先生篤志力行追古人而上之其學亦既有所見矣然猶恨取友之未廣也乃於是游梁衛厯燕趙謁鄒魯凡三閱歲始歸欣欣若有所得不能以語人也志愈篤行愈力謙虛愈下殆所謂好學君子歟先生家嗣伯敬客冬持所選先生要語屬予序今年復介使者來皇皇焉恐終不能廣其傳墜先生之業是懼予觀先生關洛京途

卷四十七

三

有集家學有穀關里有紀學顏學曾學孟有錄著述不為不富而所選僅百餘條於乎要矣予不辭固陋樂為之序者誠以先生志行予所欽服其立言又多本之躬行不詭于聖賢之旨視徒驚玄虛考諸躬行無當者逕庭矣吁可傳哉或曰關中故有橫渠先生而呂正字伯仲為先生鄉人先生之學亦自有本也

孟我疆先生集序

今寰內稱談學真切明著則我疆先生其表表云曩愚庚辰訪先生得讀其稿於山海關客歲先生起官過河西愚復得讀治平安邊諸策比入京又得讀里居稿已復盡取

先生生平之作讀之其曰理學辨疑蓋懼鄒魯微言寢解寢遠而直指宗旨也其曰政事要略蓋憫蒼赤重困因病立方而力拯末流也至答人諸東及所為曰詩曰文皆發揮道要寫吾真機而匪以文也愚因為訂次之喟然曰茲不可傳乎適鄒君爾瞻氏謂先生一代醇儒其言可傳約愚共為鈔梓愚觀先生以真儒高朗之資專意聖人之學體驗日久操存日熟履踐日篤性靈日徹其問學淵源論議通透與清介之操經綸之豫鄒君之序備矣請得以闡其心蓋昔者孔孟思以斯道易天下顧獨不得一遇而濟世拯民之心皇皇汲汲一日不忘先生學務真修志切拯

卷四一

甲

世斯民疲苦盡然疚衷人心陷溺怵然懼念接人則必振以學而又因事竅者無稽之談嘗述立人達人九經王道之論以謂學者必如是而後為實學苟不然而視民困苦漠不關心忍也亦有所得默默不以語人私也此其心不庶幾哉皇皇汲汲矣乎以故諸所著作率是心流注眎世儒談本體而玄虛枯寂竟勘升堂語經濟而土羹木蕘卒難充飽者奚啻南北憶隆慶己巳晤先生迄今十有七年其相與也密其知之也真故樂與同志共梓其稿而併闡之如此

砥己名言序

予年友張憲周泉陝副過予山房縱言及砥己名言曰人不學道之謂病吾病吾多枝言也有言砥病吾多顛行也有行砥病吾之心吾不克轄攝也有心砥皆稽往哲銓前言將希病病不病以庶幾學道也者孟生曰予觀三砥而易之復道可知己夫人心以宰之言行以樞機之然不能保其無病砥之斯復之矣是故危微諄切養長操存非過也蓋旦晝斧斤靡匪心病不砥之胡以復得其職金口三緘易心後語非過也蓋傷易與繁靡匪言病不砥之胡以復中其倫蟻封折旋雖鳴待旦非過也蓋媮惰恣睢靡匪行病不砥之胡以復冀其成故病者予之砥者也砥者脫

卷四一

五

乎病者也病欲瘳而罔砥譬忌醫輩即神農良方徒設耳名言輯而不以砥病譬註本草即岐伯領首將言用之是故砥必緣病病必嬰砥自病自砥自瘳昔孔子稱顏子曰有不善未嘗不知知之未嘗復行也易曰不遠復無祇悔元吉是故善言砥者莫如易善用砥者莫如顏蓋堯舜周孔以來學道之正脈也故夫心也言也行也砥之斯復于無病病去砥亦無所事事故曰予觀三砥而易之復道可知己抑易不又云乎復其見天地之心人之心天地之心也心復則言行皆得不然滅東生西頻復非休復也甚且迷矣學道云乎哉然則三砥一砥也讀名言者自得

之

興學會約序

予新安舊無會嘉靖乙丑予獲謁西川先生歸始創立以講學然有約而罔所發明萬厯丙申夏年友虞城啟昧楊君以大垣都諫遷官道函谷登壇說法與會者七十餘人皆色喜而君復出其邑令約觀予予諦覽之意慨旨腴詞平道大無論邃養者首肯即初學讀之恍若撒蔕屋還逆旅欣欣睹天日而樂天倫也約殆稱良哉予聞虞城舊亦無會其師士咸以啟昧講此學相率稟立故會立而風動於乎唐虞三代時則有學而無講之名講學自孔子而始

卷四十七

十

影由孟子迄兩程時則有講而無會之名會講自朱陸而始著迨於今在在有會會會有約然稱提明堯予尤取乎虞城典刑大備條示臚列予尤取乎立志一語蓋今之人無異于堯舜以來之人而得與斯道者晨星非學不講凡以志弗立爾乍興乍仆一暴十寒精舍蜩毛聖賢麟角厥有餘哉是故立志乃扼吭語而易視者必非致道之儔友人某將重刻以傳馳書問序予念新安有約而不能發揚約可愛而不知傳殊愧二君儻同志者信古今無二性以聖人為可學亦不奪鴻齊毋咻楚此志誠立此學自純庶幾唐虞相傳道脉常明而茲約為不徒云

鄉賢邱方山先生實紀序

茲紀也吾新安庠生邱泮哀輯諸家所為乃祖方山先生誌銘表贊傳跋文移皆實錄而冠以鄉賢著德也今制鄉祀惟論德以求海寓稱與否吾不敢知若先生者誠無愧已先生自束髮至闔梓簡重孝友樂道安貧雖發迹異域而砥行立德真有鳳翔千仞氣象吾師洛陽西川尤先生當世大儒也嘗訪先生山中膝席論學不忍去稱曰古人至推遜以為弗及向非先生成德則不泛交不輕許可真如吾師胡獨取于先生昔尼父門牆嘗三千矣語成德者不越安貧之顏孝友之曾閔簡重之冉數子而止他日記

卷四十七

十

列從游陳蔡諸賢必躋德行于言語政學之上夫言語政事文學今昔所謂難能而可貴者孔門何以次德行也蓋有本末學有先後譬諸木德其根而言語類則枝葉也譬諸水德其源而言語類則流派也根深者枝葉茂源遠者流派長孔門論人必先德行以此今制蓋與孔門意同而立德如先生庶幾聖人之徒可為俎豆增輝甯獨無愧吾故因先生孫諸僭敘簡端蓋不徒嘉其表章先德抑使學者監于先生從事根源達諸枝葉流派而毋戾聖學先後本末之序也

川上會簿序

孔子曰德之不修學之不講聞義不敢徙不善不能改是吾憂也此萬世講學之法程也吾黨每月會川上凡三日可謂知講學矣試時一反觀不善果盡改乎聞義果即徙乎德果修乎如是而講方謂之真講如是而學方謂之真學如是而會方謂之真會將親戚鄉黨善之不但可以成己亦可以成物若徒陽務會講之名而陰實悖之梗中飾外事弄慕鵠甚者右利崇爭無異市販之機穽豈但負卻嘉會亦且取嗤戚黨已不免為小人而又沮人向善之心其得謂之可乎自今各務真修飭躬勵行過相規而德相勸心相下而情相親會不可虛亦不可間庶幾仰體孔子

卷四十七

八

之憂不辱川上而講會亦尚有益哉吾黨勉之

澠池正學會約序

澠池馬子厚楊子要鄭元晦上官體良張有孚既誦習孔孟之訓斌斌稱學士矣又相與過新安而商學余乃述所聞先師尤先生教言莫非孔孟求仁集義之學欲其擴充良心常存天命之性以毋令意見口耳技好俗情所移臆諸君聞之亦既喜見于面欣欣欲從事矣已又念此學不可一日無友然非訂會觀摩則久而意歇氣勸因以隋情者有之於是聯友為會以月川先生為邑前哲而又得私淑吾先師迺設兩先生位于會所示儀型也亦既得所師

資矣然兩先生皆正學以故甫會而馬嶺千秋之士靡不願入廷及布衣雲擁川至可以見人心之同而正風俗美教化於此焉繫所關亦既非渺小矣他日馬子偕諸君來述其事且請書數語引會約夫諸君之欲從事此學如此其真也師資如此其正也感乎如此其速也以是觀摩足矣余復何言余惟學者不患論議少而患躬行之不至不患切磋寡而患志意之不親志意親則視人猶己不論語默皆足相益而不致于相盪躬行至則推己及人不論親疎皆足相成而不致于相睽然又必以純潔為洗心之極以淡泊為養性之基愈會愈學愈學愈正良心日著性命

卷四十七

九

日切將意見口耳無所著技好俗情無所入庶幾乎孔孟求仁集義以無忝居兩先生之鄉其或徇外務名黨同伐異面折博責善之譽玄談落異學之窠諸君諒不爾爾而亦豈諸君所以訂會務學意哉詩不云乎靡不有初鮮克有終余更願諸君之終之也

三子紀過簿序

人之言曰惟聖人能無過信斯言也詰稱不吝語幸人知湯孔不足為聖與是知過亦聖人所不能無第與學者之過不同總之改之為貴耳吾人習染既深知而改改而不免再犯三犯循環弗已也不求所以必改之方可乎於是

三子有紀過簿之設焉紀之者將以求改也蓋曰吾有過吾紀之庶幾睹斯簿也悚目惕心報顏汗背將有言也將有為也監於覆轍不致復犯乎斯亦昔人分豆識念之道意已或曰學須真知真改美假于簿不然過小則紀隱微與重大則未必紀簿亦奚為余喟然曰亦顧其志耳古之人亦有犯大不韙為今初學所諱昭昭簡冊不能掩人耳目而不害其為聖賢也者要亦其有必為聖人之志終能有成過卒不為累耳又惡知三子之志之不若斯也吾慨聖人不得見又慨習染未易祛而改過之士寥寥也於紀過簿有取焉書之以俟

記

翟家莊義塾塾田記

余友洛陽金文中個偉嗜義嘗置祭田族田聲稱溢兩河矣乃者建義塾一區又置田百畝供塾師既竣事詣新安語余曰黃唐以前尚矣虞夏商周之世庠校徧寰區即窮鄉莫不有社有師是以陶鑄醞染多明經潔行樸茂敦倫之士而風俗醇治化美迨後功利日興明經者化為記誦潔行者飾為名高樸茂敦倫之士雖未嘗無然環鄉井不多睹邁無他庠校雖設社師盡亡故也不揣嘗欲建塾延師羣鄉族子弟教導之蓋有志未能者數歲適始諧焉然

卷四十七

十

卷四十七

十

慮涉私創且虞見驚後人亦既請于按臺徐公檄縣給帖矣願子一言余攷傳記義塾與田之名不多見竊怪古今士大夫衆矣當其得志時邸廬詭麗阡陌縱橫且猶不免為里中忌況敢望出所有以及人間嘗讀宋錢公輔朱考亭所撰義田學記慨然慕希文德華之為人彼其或位都卿相或百里為郎而皆有祿可施然兩者猶未能兼如文中錄臬掾以潔廉著過能併創塾田令鄉族樂有師學且不苦供具藉海內聞風而起社師相望助庠校所未及治化安得不美風俗安得不醇明經潔行樸茂淳倫之士亦安得不興且多余故表之庸告後來使知是塾與田匪直闢一族一鄉修守勿鬻而文中高義煜然與劉范並傳竊又怪當時為詭麗縱橫者未嘗不與其人俱沒孰若蘇州玉山至今有榮聞夫然後知文中之見遠且大也抑師事王文憲踐履誠篤著述以淑後進非仁山先生歟文中固其雲仍也余仰止仁山不可見見其裔嗜義已可與言又況從師知慕聖人之學乎余師西川尤先生闡聖學為昭代大儒而文中篤信服從然則余深嘉樂為記者獨塾田之建已哉居于茲者必以此學相濯磨一湔功利還于虞夏商周庶無負文中之義文中名廷試有子曰學古郡諸生嘗從余游與其父同志例得併書云

新安縣條鞭法記

海內行條鞭法者多矣吾新安則自我侯曾公始侯自甲申來宰邑事約已愛民凡蒞官行政載在令甲者肆然具舉已迺洞燭吾邑征輸蠲起訖無畫一之法徵納曰大戶歲用百十十餘家供億曰里甲歲費不貲其狡黠則倚以為奸弊孔百出而閭閻者卻見結于積習郵庫庾級尤為民靈公家之賦役者一而它費倍之坐是偏累蕩產者什九民視數役不啻猛虎毒蛇侯喟然曰吾既為民父母坐視不為之所是重困吾民也遂議行條鞭法悉心緯畫臚列條分兩稅及驛傳拋荒諸項歲訂銀一萬一千九百六

卷四十七

十二

兩有奇而傾解耗費皆在焉均徭及一切酬費歲訂銀五千八百九十三兩有奇而應解諸費皆在焉一邑賦役之額盡是矣其徵折也兩稅等取諸糧石均徭等取諸丁糧邑之糧自學田武場泊界村大張逃租五十一石二斗二升二合八勺外實一萬五千一百三十二石四斗八升三合六勺七抄三撮石徵銀八錢五厘有奇此徵折兩稅等法也吾邑山多地瘠民故不習商賈舊勘上三則戶僅以中下六則供輸自優免外實七千二百五丁中上則每丁徵銀七錢四分二厘有奇下下則每丁一錢一分有奇餘四則視中上遞減一錢三分有奇合之得二千一百七十

四金有奇糧自免外實一萬四千七百八十一石四斗七升石徵銀二錢三分三厘有奇而寄莊石加五分合之得三千五百二十金有奇此徵折均徭等法也曩昔蠲征括為一條而病民若大戶若里甲若郵庫庾級之類一切罷免俾百姓曉然知丁租之數惟此賦役之數惟此然又人給印牒歲兩征輸置櫃公庭民自封投銀有定期民惟據牒輸之其它解納諸費毫無所擾議既定白于撫院臧公按院劉公守道先王公今李公巡道鄭公郡守韓公咸報曰可行既暮年邑之人謹然稱便相率請于當道勒石以垂永久懼紛更也亦報曰可於是邑庠生邵獎朱時用等

卷四十七

十三

耆民邵達春等謀諸學博張君永清邑幕陶君西遠使持狀詣都下索余記余惟君子為政非徒悅民漸於善治非徒更化漸於安民行條鞭者或釐弊未盡或經畫未妥終致變更者有之侯之訂是法也殫力勞心鉅細具備上不廢公下不病民百年敬政一旦嘉興百姓更新田野喁喁若解倒懸而置之衽席易謂窮則變變則通通則久又曰神而化之使民宜之其是謂乎宋儒有言寬一分民受一分之賜今法歲不過一萬七千九百餘金回視曩昔殆省三之一民之受賜普矣國宜欣欣鳴于當道祈垂永久也夫為民父母宜同欲惡審趨違乃民之欲趨在此獨奈何

違其所趨惡其所欲耶繼侯者親是石諒必有同心矣異日丁有消長事有增損亦惟因時調停潤色之爾其法固未可輕廢也余樂侯有是政而又樂邑之人有是舉於是乎記侯名唯丁卯鄉進士四川富順人

澠池月川先生祠記

月川曹先生倡聖學於未宣之際澠池其故里也而祠僅一楹石侯顧瞻嘆曰湫隘若斯非有司者責乎會按臺侍御陳公移檄拓大於是卜地東郊創祠三楹左右有室啟閤有門春秋有俎豆牲帛以祭規畫既備矣迺偕學博諸生過新安以狀屬愚為記愚惟先生之生也家邦胥化心

卷四十七

七

悅誠服於霍蒲人士方嶽大臣之禮敬之也不敢過以屬察其歿也或曰百代真儒或曰本朝理學冠冕迄今二百年君子淑其緒小人頌其休而疏請從祀爭刻遺書廣其傳者踵相望也豈先生有求於天下後世之人天下後世有私于先生哉蓋先生崛起兵戈擾攘之餘首取六經入子書深繹而實踐之而聖學賴之以倡夫學惟實也故愈久愈光愈久愈光故實學愈重於天下而世之推尊先生也愈遠而愈益盛且斯祠之作凡登降堂階者能無有感而興起乎此又侯與侍御風厲後學意也甯獨以崇前賢而愚因是竊有慨者三孔孟演虞庭之傳又千餘年而周

程續之曰太極曰識仁蓋得一貫集義之學之宗者此義不明即終身從事恐不免於義襲冥行愚觀先生以太極為立本而求至乎聖人之道以參天地惟此心而謂心非血氣兩言者濂洛遺旨也乃或但稱實學而不察其宗徒據門人諸纂為臆評而不究聖門之所以評人物也要亦未為定論聖門四科必首德行顏不違仁尚矣其次若關若冉孝敬自足取信至伯牛獨以疾見惜而齊魯論語六經舉無片言隻行可致乃儼然廟庭七十子且多讓而坐下此何以說也先生念念實理孝敬尤人欽服令得聖人而事之當居德行之科又况敷政作人博貫編削視無可

卷四十七

七

致見者稍殊如謂彼為夫子所取則先生天下深服篤信誠非阿私所好者而從祀尚格其請吾又慨議禮家叅對盈庭國是卒無從定也叔季道微即一節義一孝廉之表每視豐約為幽明不則亦必藉有氣力者為之推挽先生祀典坐此濡遲曩愚序錄粹謂是於先生無加損然世道人心繫之能無慨乎愚也重感政學之衰深嘉侯與侍御斯舉又幸先生久而益彰而後之有感而興者宜益信此學之必貴務實也特為記之且以俟議禮者致焉侍御名登雲唐山人丁丑進士侯名允珍同州人己卯鄉進士學博黔中越應捷膠西王夢旭覃懷潘汲諸生茹進賢馬